

# Powšitkowne WOZJEWJENJA

njedźelu, 8. nowembra 2015

## Koncert duchowneje hudźby w Chróścicach

Drježdžanski chór „Vocalitas Nova“ wuhotuje njedźelu, 8. nowembra, w 17 hodź. w Chróšćanskej farskej cyrkwi duchowny koncert. Wón zanjese liturgiske a duchowne chórowe twórby wot baroka hač k romantice. „Vocalitas Nova“ su młodzi něhdyši Drježdžanscy kapalnicy a krucianojo kaž tež spěwarki z Drježdžan a Lipska. Wšitcy su wutrobnje na naročny koncert duchowneje hudźby přeprošeni.

## Swjedźenski tydzeń k znowawotewrjenju Budyskeje tachantskeje cyrkwe

K zakónčenju dwulětneho wobnowjenja ma so Budyska tachantska cyrkej swjateho Pětra z ekumeniskej Božej službu sobotu, 14. nowembra, w 17 hodź. znowa wotewrěć. Pontifikalne kermušne kemše ze starobiskopom Joachimom Reineltom su njedźelu, 15. nowembra, w 9 hodź. Samsny dzeń we 18 hodź. wuhotuje tachantski chór duchownu hudźbu. W běhu naslědneho swjedźenskeho tydženja su mjez druhim dalše Bože služby a koncerty duchowneje hudźby planowane. Zajimcy změja wšědnje tež składnosć, sej wobnowjenu Boži dom we wěstych časach wobhladać. Z předstajenjom „Messiasa“ Georga Friedricha Händela njedźelu, 22. nowembra, w 16.30 hodź. w Marije-Marcínej cyrkwi swjedźenski tydzeń zakónča. Cyłkowny wobšěrny program je na internetowej stronje pod [www.posol.de](http://www.posol.de) wozjewjenu.

## Zhromadny dzeń přěnjowoprawjenske džěci

Dekanatne dušepastyrstwo přeprošuje wšitke džěci, kotraž so na přenje swjate woprawjenje přihotuja, na zhromadny dzeń pod hesłom „Cool kadla-fecich holca“, srjedu, 18. nowembra, wot 9.00 do 15.00 hodź. do Njebjelčic. Započatk je z Božej mšu w cyrkwi. Zajimcy njech so prošu hač do pónđzele, 9. nowembra, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk, kotryž wučinja štyri eura.

## Młodostni na Chrysta Krala do Chróścic

Nyšpor wosebje za młodostnych budže na swjedženju Chrysta Krala njedźelu, 22. nowembra, w Chróšćanskej cyrkwi. Po tym su na faru do „dziwadłoweje kofejownje“ přeprošeni.

## Za Swětowe zetkanje młodžiny so přizjewić

Serbscy młodostni podadza so klětu zhromadnje na Swětowe zetkanje młodžiny do Krakowa. Tute wotměje so wot 20. do 31. julija. Přizjewić měli so k tomu najpozdžišo hač do 20. januara 2016 z formularom. Tute su w cyrkwjach wupoložene. Samsny formular je pod [www.posol.de](http://www.posol.de) wozjewjenu. Wšitke nadrobne informacije su na tutech flajerach tohorunja podate.

## **Mandželske seminary 2016**

Terminy mandželskich seminarow klětu w Smochčanskim Domje biskopa Bena su 12./13. februara, 26./27. februara, 22./23. apryla a 25./26. nowembra. Přizjewić měli so zajimcy pisomnje pola Dekanatneho dušepastyrstwa, Młynski puć 4, we 01920 Worklecach. Formulary k tomu su w cyrkwjach wupožene.

## **Zetkanje samostejacych w Smochćicach**

Samostejacy ze serbskich wosadow su na swoje přichodne zetkanje wutoru, 1. decembra, w 14 hodž. do Domu biskopa Bena w Smochćicach přeprašeni. Zajimcy njech so prošu hač do srjedy, 25. nowembra, w redakciji Katolskeho Posoła přizjewja, telefonowe čisło (0 35 91) 55 02 12. Štóz chce wotewzaty być, njech to prošu zdžěli. Wšitcy njech sej Wosadnik sobu přinjesu.

## **Hromadźa hodowne dary**

Towarstwo swjateje Filomeny z.t. chce tež lětsa džěci a swójby w čěskim Dolním Podluží, w bołharskim měsće Razgradze a wokolnych wsach z hodownymi pakćikami zwjeselić. Jich wobsah njeje předpisany. Wotedać móža so pakćiki wot pónđzele do štwórtka, 16. do 19. nowembra, stajnje wot 17 do 18 hodž. w Smjerdžečanskim kulturnym domje. W tutym času přijimuju tohorunja derje zdžeržanu drastu a počehnjenu. Dalša móžnosć podpěry su pjenježne dary, z kotrychž ma so transport financować kaž tež wšelake socialne zarjadnišća podpěrać. Přepokazać móža so na konto St.-Filomena-Verein e.V., IBAN: DE45 855 90 000 037 262 47 01 pola Ludoweje banki Budyšin e.G. pod hesłom „Razgrad“.